

Noticia
Transparente
di Gobierno

ISLA ONLINE

Diabierna 22 Maart 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



STABILIDAD
Y
PROSPERIDAD

2 0 2 4



Gabinete Wever-Croes



E LOGRO DI ARUBA PA RICIBI 14.2 MIYON EURO FOR DI UNION EUROPEO TA PA FINALISA E PROYECTO DI E-GOVERNMENT

“E sosten financiero aki no solamente ta un inversion den nos tecnologia, pero e ta un inversion den nos hende, den nos pais, den nos gobierno y den nos futuro”

Durante e Innovation Summit 2024 diaranson ultimo riba e tema "EVOLUCION", Prome Minister Evelyn Wever-Croes den su discurso di apertura, a duna un resumen di e-Government, cu ta un proyecto ambisioso di Gobierno di Aruba desde principio di gobernacion. Mundo ta den un era di avanse tecnologico cu ta bayendo hopi lihe y Aruba no ta keda simplemente un observador den esaki. Aruba a tuma pasonan sigificante pa modernisa nos servicionan publico, haciendo nan mas accesibel, eficiente, y transparente. E iniciativa aki ta evidencia di e compromiso di Gobierno di Aruba pa uza tecnologia pa mehoramento di nos comunidad, asegurando cu nos ta ekipa pa enfrenta e retonan di siglo 21 nos dilanti.

Prome Minister a expresa cu e esfuersonan di Gobierno di Aruba a ser reconoci y sosteni pa Union Europeo, for di unda Aruba a ricibi fondonan substancial pa

sostene nos esfuersonan. Aruba a logra y a firma e acuerdo financiero di 14.2 miyon euro pa por finalisa e proyecto di digitalisacion di e procesonan di Gobierno, e-Government. E suma aki lo wordo duna den tranchen. Na momento cu Aruba entrega un plan pa un proyecto, y e wordo aproba, Aruba lo ricibi e placa, y unabes finalisa, lo por aplica pa e siguiente proyecto. E prome tranchen di e fondonan aki ta destina pa realisa e proyecto di e-Government cu ta inclui desaroyo di infraestructura digital clave, implementacion di medidanan di seguridad y tambe lansamento di programanan piloto diseña pa test y refina nos avanse pa gobernacion digital.

“E logro aki cu Union Europeo ta subraya e confiansa den nos vision y e potencial di nos proyectonan cu ta sirbi tambe como un ehempel di avanse den innovacion den Caribe. E sosten financiero aki no solamente ta un inversion den nos tecnologia, pero e ta un inversion den nos hende, den nos pais, den nos gobierno y den nos futuro. Nos vision pa Aruba ta pa innovacion ta inclusivo, unda cada ciudandano tin e oportunidad pa contribui y beneficia di nos avanse tecnologico. Apesar cu por encontra retonan na caminda, tambe lo tin posibilidadnan sin limite”, Prome Minister a expresa.



Prome Minister a duna un discurso na e evento organisa pa trahadonan social

GABINETE WEVER-CROES LO SIGUI TRAHA NA BIENESTAR Y PROTECCION DI NOS MUCHANAN

Riba dia Mundial di Trahado Social, Prome Minister Evelyn Wever-Croes a atende un evento organisa pa Minister di Asuntunan Social como gradicimento pa e trabou cu nan ta bin ta eherciendo y pa celebra e dia special aki cu nan. Riba e mainta aki, Prome Minister tabata tin e oportunidad di duna un discurso, na unda el a indica cu e dia aki ta un dia pa para keto y celebra, pero tambe pa reflexiona riba e contenido di trabou social cu nos mester pa wordo ehecuta aki na Aruba y henter mundo.

Tambe, prome cu finalisa su discurso, Prome Minister a comparti su preocupacion pa cu tema di abuso sexual di mucha na Aruba. El a splica cu desde inicio di gobernacion di Gabinete Wever-Croes, Gobierno a haci tur loke tabata na nan alcance pa purba yuda na preveni e abuso contra nos muchanan. Gobierno a traha leyman y proceduranan pa percura pa haci e castigo pa cu e acto aki mas severo. A purba traha riba prevencion y educacion cu ta hopi importante pa yuda preveni y a pone mas atencion na e veld social biniendo cu eCodigo di Proteccion, "Signs of Safety". Tambe a firma MOU's pa cuido di victima. A construi e Family Justice Center y mucho mas.

Prome Minister a indica cu apesar di tur loke cu Gobierno a haci pa purba na preveni abuso contra nos muchanan, na momento cu a haya resultado di e estudio haci, a yega na e conclusion cu 99% di e casonan di abuso sexual di mucha ta wordo cometi pa un persona hopi cerca di mayornan of famia di e mucha. E resultado aki sigur ta trece cu ne hopi duda y ta pone nos cuestiona, kico por wordo haci den e caso aki. Pa cu esaki, Prome Minister a pidi e trahadonan social pa yud'e bin cu ideanan y opcionnan pa con por sigui conscientisa e comunidad lo mas posibel riba e tema aki, pa asina preveni cu e casonan aki ta sigui pasa den futuro.

"Esaki ta un dolor grandi cu mi ta carga den mi curason y mi kier a comparti'e cu cada un di boso, pidiendo boso como experto yudansa den proteha nos criaturanan indefenso, cu ta conta riba nos pa proteccion. Mi ta gradici boso di curason pa tur boso esfuerzo y dedicacion den e veld social, y mi ta spera cu boso sa cu como Prome Minister di pais Aruba, mi tin un respet inmenso pa boso trabou", Prome Minister a expresa.



GABINETE WEVER-CROES TA GRADICI TUR TRAHADO SOCIAL PA NAN DEDICACION Y PASION PA TRAHA NA BIENESTAR DI COMUNIDAD



"Gobierno lo sigui sostene cada un di boso den e lucha aki".

Riba 19 di Maart ta dia Mundial di Trabou Social y ta un dia na unda ta para keto na tur e trabounan cu ta wordo haci riba e veld social. Riba e dia special aki, Minister di Asuntonan Social Rocco Tjon, a organisa un evento pa trece tur trahado social hunto pa duna nan atencion special den un sesion di relaha y dominio pa asina por tuma decisionnan miho. E tema di e aña aki ta "Buen Vivir", cu ta un concepto conoci entre esnan cu ta den e veld social. "Buen Vivir" ta duna e hermentnan necesario, y ta inspira esnan den e veld pa realisa cu pa cada reto, tin un solucion.

E trahadonan social tambe a haya un presentacion di señora Milly Lacle riba e tema di con pa nan relaha nan mes, bahando e stress di tur dia y hayando e pas cu nan mester. Un presentacion sigur hopi interesante cu a cay na un bon momento pa cada un di nan.

Prome Minister Evelyn Wever-Croes tabata presente na e ocasion special aki, na unda e tabata tin e oportunidad di comparti un rato cu esnan cu ta labora den e veld social. Prome Minister a expresa di ta sumamente honra di por a celebra un rato e dia importante aki cu nan mirando cu trabou social ta uno noble y ta existi hopi pasenshi y dedicacion, y e mandatario tin hopi respet pa esnan cu ta haci e trabou aki.

"Como Prome Minister di pais Aruba, mirando e problematica grandi cu tin den sociedad pa loke ta abuso sexual di nos muchanan, mi a pidi nan pa yuda nos. E topico aki sigur tin nos atencion desde inicio di gobernacion. Gobierno a purba bringa e problematica aki, cambiando leyman, introduciendo castigo mas severo, a bin cu ley cu no ta caduca nunca, a bin cuCodigo di Proteccion, "Signs of Safety, y a traha e Family Justice Center. E inversion den e cartera social tabata uno grandi, pa asina purba di tur manera baha e porcentahe di casonan di abuso sexual contra muchanan, dunando nan e proteccion cu nan merece.

Continuacion TRAHADO SOCIAL....

Ta importante si pa remarca cu na momento cu e estudio a sali indicando cu mayoria di casonan na Aruba, ta wordo cometi pa esnan cu ta cerca di e mucha, manera famia, amistadnan, tanta, omo etc., ta haci e proceso pa bringa esaki uno mas dificil. Pa e motibo aki mi a pidi e trahadonan social, pa sigui yuda nos busca maneranan pa proteha nos muchanan contra abuso sexual", Prome Minister a enfatisa.

Prome Minister a expresa cu e tabata un atardi ameno, na unda cu por a wak cu e trahadonan social a wordo trata bon, y cu nan a disfruta hopi di e atardi aki bon mereci. E trabou aki no ta uno facil, pero na Aruba nos trahadonan social ta traha cu nan alma y curason pa yuda

tur esnan den necesidad, specialmente nos muchanan cu ta depende di nos pa proteha nan. E trahadonan aki a sa di demostra cu nan ta capas y cu nan tin e pasion pa haci e trabou debidamente.

"Den nomber di Gobierno di Aruba, mi ta gradici cada un di nan pa nan dedicacion na yuda esnan cu mas tin mester, specialmente nos muchanan. E respet pa cada un di boso ta grandi, pasobra ni con hopi reto tin den boso caminda, boso a sa di demostra cu boso ta sigui duna tur loke boso tin, y traha duro, superando cada obstaculo. Mi kier a bisa cada un di boso danki pa tur boso esfuerzo, y sa cu Gobierno lo sigui sostene cada un di boso den e lucha aki", Prome Minister a expresa.





**MINISTER MADURO A REUNI
CU SECRETARIO DI ESTADO
RIBA E TRABOUNAN HACI DEN
CUADRO DI LANDSPAKKET RIBA
E TERENO FISCAL NA ARUBA**

Continuacion REUNION CU VAN HUFFELEN....



Diaranson Minister Maduro di Finansa hunto cu e profesionalnan di Departamento di Impuesto a reuni cu Secretario di Estado sra. Van Huffelen pa asina duna un bista di e trabounan cu ta wordo haci den cuadro di Landspakket riba e tereno fiscal na Aruba.

Durante e reunion a brinda un presentacion di e cambionan cu a wordo introduci pa por cumpli cu tema C di e Landspakket. Entre nan, a duna un bista di e implementacion di e Plan di Impuesto 2023 y e resultado te awo di e cambionan fiscal aki cu ta toca tema

C1 di e Landspakket. A splica tambe riba e bon noticia cu Aruba ta riba e lista di cooperacion y transparencia fiscal di OECD cu ta toca tema C2 di e Landspakket. Fuera di esaki a indica cu ta trahando awo riba tema C3 y C4 di e Landspakket pa fortifica e administracion y hisa e nivel di cumplimiento/compliance.

Por ultimo a indica tambe cu reunionnan ta wordo hiba acabo pa yega na un palabracion fiscal entre Hulanda y Aruba den e prome kwartaal di aña 2024 pa asina por cumpli tambe cu tema C5 di e Landspakket.

E reunion a bay den bon ambiente na unda cu Minister Maduro y e profesionalnan di DIMP a tuma tempo pa asina por a contesta tur pregunta y brinda mas informacion pa asina e Secretario di Estado Hulandes por ta miho informa di e trabounan riba e tereno fiscal na Aruba.

Minister Maduro ta gradici sra. Van Huffelen pa su bishita y e cooperacion di Hulanda pa yuda na fortifica DIMP. E mandatario ta gradici tambe e ekipo di DIMP pa e gran trabou cu ta wordo haci pa Aruba por conta cu un sistema fiscal cu ta traha na bienestar di nos Pais.

MINISTER DI CULTURA TA FELICITA TUR POETA PA NAN PARTICIPACION NA E EVENTO 'POETA DI PATRIA' DEDICA NA NOS PATRIA STIMA ARUBA



A woman with dark hair pulled back, wearing a bright red dress with large, abstract blue and white patterns, is speaking into a microphone at a podium. She is smiling and looking to her left. The background is a light blue wall with a subtle floral pattern. To the right, there is a green plant with white flowers.

Continuacion POETA DI PATRIA....

Recientemente, Minister Maduro di Cultura a presencia e evento 'Poeta di Patria,' na unda nos poetanan a deleita e publico presente na Fort Zoutman cu nan poema dedica na honor di nos Patria Aruba na ocasion di e celebracion di nos Dia di Himno y Bandera.

Tabata un anochi bunita, yena cu talento y creatividad di nos poetanan local, na unda Minister Maduro a tuma un rato pa recorda e poeta sra. Nena Ponson cu algun dia pasa a bay descansa den brasa di Señor. Sra. Nena semper a deleita publico cu su poemanan y su manera unico di declama esakinan na honor di Aruba.

E mandatario a recorda tambe e aporte sin igual di sr. Atan Lee kende a cuminsa cu e evento bunita y importante aki na aña 2014.

Ganador absoluto di 'Poeta di Patria' a keda den persona di sr. John Freddy Montoya cu su poema 'Ki Bal'. Finalistanan a keda den persona di sra. Gilia Croes, sr. Luis Rodulfo, sra. Aurelia Croes y sra. Estefana 'Titi' Tromp-Gil.

Minister Maduro ta gradici Comision Celebracion Dianan Nacional, Departamento di Cultura y Fundacion Corector di Papiamento pa un otro evento 'Poeta di Patria' exitoso, y ta gradici tur participante pa nan aporte pa haci e evento aki uno grandi un biaha mas.



POTRET
POETA DI PATRIA





POTRET
POETA DI PATRIA





MINISTER
Dangui Oduber



DESDE 1 JANUARI 2024

REDUCCION DI PRIMA DI AZV



Kico esaki kermen pa e pensionado?



E pensionado ta ricibiendo un reduccion di prima AZV di **6.5%** pa **5.0%** riba su prome 30.000,- florin. Dus e ta pagando menos.



E reduccion aki ta beneficia e fondo di AOV y gobierno ta usa esaki pa aumenta e AOV cu un extra **1,1%** yegando asina **4,1%**. Asina e pensionado soltero ta subi cu **50,- florin** pa luna y **637,50,-** pa aña.

Minister Dangui Oduber

JANUARI 2024 A AUMENTA E UITKERING DI PENSIOEN DI BIEHES CU 4.12%

Fin di aña 2023 Minister Dangui Oduber a anuncia aumento di uitkering di pensioen di biehes cu un 4.12%. Aña 2020 y aña 2021 tawata e añanan di mas dificil den historia di nos pais. Minister Oduber ta contento di por bisa cu semper e la corda ariba e poblacion cu ta cobra pensioen di biehes y por muestra cu a zorg pa aumenta e uitkering manera cu a haya e oportunidad.

Cu e aumento di 4.12% aki, pensionadonan cu ta parehanan casa a ricibi un aumento di 84,- florin pa luna y pa pensionadonan soltero esaki ta un aumento di 50,- florin pa luna.

E pandemia a pone retonan grandi nos dilanti como pais, pero hunto den union pais Aruba a surpasa tur. Ora nos a kere cu situacion lo bira miho e guerra na Ukraina a cuminsa y esaki a conduci na inflacion rond mundo y factornan externo cu tin hopi influencia riba Aruba.

Como e Minister encarga cu SVb, naturalmente tin cu pensa riba nos grandinan y con pa yuda nan den e presion cu inflacion a trece cune pa nan. No obstante tur e retonan di aña 2020 y 2021, aña 2022 a cuminsa muestra mehorancia y 2023 tawata uno excepcional pa nos turismo y economia. E recuperacion rapido di nos turismo y economia ta keda ta uno sublime y ta danki na esaki Gobierno por aumenta e uitkering di pensioen di biehes.

Minister Oduber a indica cu manera tur cos ta bayendo Aruba a sera un aña 2023 historico y cu un recuperacion di 100% di nos turismo den comparacion cu aña 2019. Esaki sigur ta un logro hopi grandi pa pais Aruba y e ta demostra e resiliencia di nos comunidad. Tur esaki a conduci cu tin espacio pa ahusta uitkering di pensioen di biehes.





TECNOLOGIA INNOVATIVO DEN INDUSTRIA AGRICOLA LO SIGUI BENEFICIA ECONOMIA DI ARUBA



Continuacion TECNOLOGIA INNOVATIVO....



Prome cu e Aruba Investment Summit 2024, minister Geoffrey Wever a bishita Royal Peppers na Waddinxveen. Royal Peppers a invita e mandatario pa wak con ta usa tecnologia di cultivo pa produci na un manera efectiente promenton di diferente color.

Royal Peppers ta un compania di famia, di rumannan Peter y Patrick van den Bosch cu produccion di promenton na 5 diferente localidad na Hulanda.

Durante e bishita na Glastuinbouw Royal Peppers, minister Geoffrey Wever, hunto cu representate di ministerio di naturalesa, Sr. Anko Koopmans y directora di Departamento di Asuntonan Economico, Comercio y Industria sra. Maria Dijkhoff- Pita a haya un splicacion y tour di Sr. Peter van den Bosch riba con e compania ta produci promenton a base di tecnologia innovativo di cultivo.

E compania a indica cu basa riba peticion di cliente ta produci e cantidad y color desea di promenton.

Pa garantis e calidad di produccion, e compania ta registra tur datos via un sistema computarisa. Acceso na e datos ta disponibel na cualkier momento pa wak con e proceso di cultivo di e promentonnan ta bayendo.

Diversifica Aruba su economia ta prioridad di maneho economico di gobierno di Aruba. Stimula agricultura comercial y inversionnan den esaki ta di sumo importancia pa desaroyo di e industria agricola como otro pilar di economia.

W Ta un realidad economico cu Aruba ta importa mayoria producto entre otro fruta y berdura. P'esey ta importante pa explora e rol di tecnologia innovativo pa desaroya e industria agricola.

Companianan Hulandes como lidernan den uzo den tecnologia innovativo di cultivo y exportacion na mundo ta un partner importante den esaki, segun minister Geoffrey Wever.

Minister Geoffrey Wever:

ARUBA INVESTMENT SUMMIT A POSICIONA ARUBA COMO UN OPCION FACTIBEL PA INVERSION HULANDES EUROPEO DEN REGION DI CARIBE



E Aruba Investment Summit cu a tuma lugá ayera a resulta den un éxito rotundo, atrayendo mas di 100 participante. E evento a ilustra claramente e potencial económico di Aruba y e interés di inversionistanan Hulandes, den e oportunidadnan cu Minister di Asunto Económico a presenta durante e Summit.

Tin potencial pa centronan di Oranjestad y San Nicolas, tambe pa e desaroyo y di agricultura comercial na Aruba. Tambe tabata tin presentacion encuanto e transition energetico y potencial den maneho di desperdicio na Aruba. Esaki ta reafirma Aruba su posicion como un destino atractivo - #1 den region Caribe - pa inversion, segun minister Geoffrey Wever.

E feedback ricibi a subraya e necesidad pa enfoca riba innovacion y sostenibilidad den cuadro di desaroyo económico, y optimisacion di uzo di recursonan. Ademá, e interés tabata notabel den e vision pa conecta centro di ciudad di San Nicolas cu lama Caribe. Conectando centro di ciudad cu lama ta habri oportunidadnan nobo ariba un area proyecta di ta 103,000 m². Nan interés tabata imenso ariba con y ki tipo di desaroyo por tuma lugar, y den ki 'timeframe'.

Dialogo ta sumamente valioso pa crea colaboracion entre diferente stakeholders. Despues di Aruba Investment Summit a facilita un momento pa networking entre empresarionan y representantenan di gobierno Arubiano y Hulandes. E evento a sirbi como un catalisador pa mas dialogo y accion dirigi riba atrae mas inversion cu ta alinia cu e vision di desaroyo sostenibel di e isla.

Minister Geoffrey Wever ta gradici tur e participantenan, oradornan, y patrocinadornan pa nan contribucion valioso. Danki special na Sr. Vincent Storimans pa e sosten valioso, na minister Plenipotenciario, Sr. Ady Thijsen, y na Sr. Diederik Kemmerling di KVK Aruba pa nan participacion activo. Un danki tambe na e comision cu a organisa e evento. Mirando pa futuro, e Aruba Investment Summit a establece un fundeshi solido pa dialogo y desaroyo, y nos ta optimista cu a logra resalta e oportunidadnan, anticipando mas colaboracionnan como resultado di e encuentronan positivo aki.

Proximamente lo ta organisando un cumbre na Aruba den luna di augustus invitando e inversionistanan aki pa bin wak pa nan mes, e desaroyonan na Aruba y posibilidanan cu Aruba tin pa ofrece.

POTRET ARUBA INVESTMENT SUMMIT.....





DESTAHO PA COMBERTI EX-CODEMSA DEN UN CENTRO DI HUSTICIA TA 5 DI APRIL BINIDERO

Manera ta conoci, aña pasa a reuni cu APFA pa loke ta e construccion di e centro di husticia na ex-codemsa.

Na 2022 e ley a wordo aproba unanimamente pa asina e edificio aki wordo comberti den un centro di husticia, caminda lo bay ubica diferente departamentonan hudicial hunto bou un solo dak. A base di esaki, APFA a adkiri un "consultant" pa prepara ful e destaho pa cu e proyecto aki cual lo tuma luga dia 5 di april binidero, pa asina por scoge e compania cu lo bay ehecuta e proyecto aki.

Manera ta conoci, muy pronto lo bay construi un centro di husticia nobo na ex-codemsa, caminda lo bay ubica diferente departamentonan hudicial, entre otro; Bureau City Inspector, Inmigracion Aruba, CEA y KPA.

Esaki, cu e meta pa introduci diferente funcionalidadnan nobo cu nos no conoce ainda den husticia, y na final di dia percursa pa reduci gastonan di diferente huurnan cu

tin andando na e momentonan aki.

Despues di un proceso amplio caminda a involucra e diferente departamentonan y sindicatonan, APFA a prepara e destaho publico. Pa nan por logra esaki, nan a adkiri un consultant pa loke ta e parti di construccion, kende a prepara tur e documento y pinturanan pa e destaho por tuma luga. E destaho aki lo tuma luga dia 5 di april binidero, pa asina nan por scoge e compania cu ta bay percursa pa e construccion di e centro di husticia nobo.

Manera a indica caba, e proyecto aki lo bay tin varios beneficio, cuminsando na e hecho cu ta bay paga menos na huur y ta bay tin condicionnan di trabou completamente nobo, mirando cu tur cos ta bay ta nobo den e edificio. Ta trata di un inversion di alrededor di 20 milyon florin, pa asina e trabounan pa cu e edificio nobo pa e centro di husticia, por inicia lo mas pronto cu ta posibel.



OPENBARE AANBESTEDING

PUBLIC TENDER

Coenobita Real Estate 101 Development V.B.A.

Coenobita Real Estate nodigt hierbij belangstellenden uit voor deelname aan de openbare aanbesteding van het werk:

Sloopwerken deel I ex-Codemsa gebouw

Het werk bestaat in hoofdzaak uit de nodige demontage en/of sloopwerken binnen in het ex- Codemsa gebouw en wat bouwsels erbuiten te Cumana.

Alles zoals omschreven in bestek met tekeningen BKConsult 23P23 dd 19dec '23.

Bezichtiging is op 19 maart as om 9:00 am ter plaatse. Vragen kunnen worden gesteld tot vrijdag 22 maart as, 11:00 am. De nota wordt toegestuurd aan de kopers van het bestek binnen 3 dagen.

Aanbesteding is op vrijdag 5 april 2024, om 11:00 exact ten kantore van BKConsult.

Het bestek is te koop bij het kantoor van BKConsult N.V. aan de Galileistraat 2 vanaf 14 maart as. voor het bedrag van
AWG 100,-



MINISTER ENDY CROES TA FELICITA COLEGIO NIGEL MATTHEW CU NAN EXITOSO FERIA CULTURAL

Riba dia 15 di maart, Minister Endy Croes acompaña pa su kerida esposa Dilailah Croes – Odor a atende e di dos Feria Cultural organisa pa Colegio Nigel Matthew en conexcion cu Dia di Himno y Bandera.

E Feria Cultural tabata bon bishita, esnan presente por a purba e variacion di cuminda crioyo y pasaboca y bishita tent di artesanía y producto produci pa nos hendenan local. Tambe tabatin diferente wega popular pa mucha, hoben y adulto. E meta di e evento aki tabata pa recauda fondo pa e biahe educativo di e alumnonan di Havo 4 y HL 2 y pa e Art Club. E alumnonan ta biahando dia 3 di april proximo pa Canada, unda cu nan lo bishita diferente scol.

Durante e anochi tabatin presentacion di varios artista renombra y banda musical. Pueblo di Aruba por a presencia e primicia di e obra teatral prepara pa e alumno – y docentenan, titula: ‘Greetings From Aruba’. Pa conclui, Minister Endy Croes ta felicita e alumno- y docentenan di Colegio Nigel Matthew cu nan exitoso Feria Cultural!



Continuacion FERIA CULTURAL....





Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

2024

AÑA DI STABILIDAD Y PROSPERIDAD